

AGLI AGRICOLTORI del Comune di Rimini e Circondario



Fra tutt quant i contadein
chi coltiva di terren
si in pianura che in montagna
specialment i quì in Romagna,
Rimne e tutt e circonderie
a si rimast più reffretterie
più incaied con e progres
sviluppèd si temp d'ades.
Ed infat i là a Ceseina
cle una ardida zittadeina
a Forlì, Frampul, Faenza
ià al su legghi d' resistenza.
Sa calam pou zou tla basa
at chi paes chiè 'na gran masa
Ravenna, Russ, Bagnacaval,
Lug, la Masa i là at cli val
(am intend a te Frases)
andand su per e Bolgnes
sarà vint'an e pu passèd
chiè za tutt organized
Donca Rimne cle un paes
(ca ne so sa la avi intes)
cla del beli tradizioun
de quarentazinq, trentoun,
d'ardiment ed enca d' gloria
registredì i là tla storia
a ne vergogna ai temp d' ades
che sia alla coda de progres! ?
A ni sarà tent istruzion
ma fra tent i ne qualcoun
qualchecosa chià imparè
in te mond quell ch' sa da fe!
i na d' avè abbastenza veista
d' emancipes da iafarcista,
dai borghes, da tutt e cler
da di french e su parer? ! . . .
Corpo enca d' una biscia
bsogna quist poc chi capiscia,
o verament, chins ciapa cura
dov ch' iavrebb da ve premura!
Ades a perle a mi partid
specialment mi più istruid

(ben intes mi popoler)
quest sarea e prim affet
chiavrea da fe andnd avent
istruì i pouvre ignorant
per migliorei la condizioun
quest sarebb la su missioun! . . .
Che poc e conta avè la boria
d' fe e chep popul per la gloria,
quand l' amena l' obbiectiv
le un affer sempre cattiv? ! . .
Voiet ancora agricultour
associev con bon amour
com ià fat i quà in Romagna,
a ni da di can si guadagna
a formè un associazion
come fors iv dis qualdoun,
(chin risentreia un po d' dolor
perchè le comod a fe e sgnieur),
a ma queist chiv fa eccezioun
portei subit st' paragoun
che un battech ciaped da sol
el romp ench un ragazzoul
ma un bel fasc lighed insein
i vo la sghetta o e manarein.
An ve digh per metve su
Dio me guerdal quest mai più!
per istighev a fe de mel,
ma per rendve più morel
mei educèd e più istruid
che basta d' ess tent invornid!
Perchè voiet a dil sincer
al fe trop e vost dover
le giust ca eva i vost direitt
d' anma e d' corp voiet pureitt.
Se qualdoun i ha capi
d' anma e d' corp quel che vo di
al spiegarò diversament
acciò cal tneva ben in ment.
D' anma me a n' intend a di
ca i direitt d' ess istruid
d' un istruzion sena, sincera,
chi v' insigna quel che vera

francament senza paura
 com ch' prescriv al lez d' natura
 no del fiabi e tent el fregn
 ch' fa rid i pull a se bech l' legn!
 Chi v' inspira fratellenza
 dl' egoisme i ne abbastenza
 invetered in oggigiorne
 specialment i qui d' intorne.
 La vosta besa d' ducazioun
 la ha da ess in conclusioun
 che s' patisc 'na creatura
 a vi da de tutt la premura
 d' solevel da fei de bein...
 d'ajutel magari si quattrein
 che sa nes nienca e cappel
 an cesa d' ess un nost fradel;
 Se fuss s' na streda d' perdizioun
 da fei sel bon 'na correzioun!
 per potel riabilitè
 quest le quell ch' savria da fe.
 Ma no!... se s' ved che va te fos
 a gridei la crosta addos!
 i prinzipie ca insgnè Crist
 una volta i n' era queist!...
 sebben che ades di predgadore
 chii iava ded un ent colour.
 E ben de corp le diferent
 sarea e vost manteniment
 per resseist a lavorè
 che senza d' quest an potè fè!
 sa vli cav dura l' energia
 per qualunque lavor ch' sia.
 Ades an digh da fev al speis
 com fa i sgnior com fa i borgheis
 da magnè manz e cappoun
 risot, lasagn e maccaroun;
 ma basta sol che pen e vein
 a mi povre contadein
 ca ni venga mai a mench,
 naturel... chi vo qualch french
 per al spes più necesserie
 scherp, capel un po d' vestierie
 insomma in conseguenza
 chiava quell chin po fe senza.
 Quest ca ho deitt bso chi l'ottenga
 i contadein, per via che venga
 i vo la lega... associazioun
 per persued a mi patroun!
 che sa vli chiv dag a ment
 a ne bon un i ne vo zent
 e pu ca siva tutt compat

per e giust sa quell ch'va fat.
 Fina ades a vo accennè
 presapoc quel ca i da fe
 per ste mei i qua te mond
 ma però an vi da confond
 sav trovasve tutt unid
 da ragnè sa ielt partid,
 spoliticand con del questioun
 per portev un paragoun
 com ch'ia fat i là in Romagna
 vliv savel chi é ch' guadagna
 con tutti al liti d'operai?
 le ieguista, iusurai,
 le i padroun proprietarie,
 le i crumir, le tutt iagrerie
 che siv' ved tutt quant unid
 senza distinzion d' partid
 con un pat d' fratellenza,
 d' mett insein, la su speranza
 lai svanisc in t'un moment
 come la nebbia in faza e vent!
 Sichè, donch no questionè!
 sa chi punt ca n'iarivè
 a capi se vost zarvel
 se alfein di cunt le ben o mel!
 fasi sempre e vost dover
 e fe che e pret, carabinieri
 can liva bsog un azzì....
 e a vidri ca svi content....
 Donca me av artorne a di
 che tutt quant av si d'unì
 in t'una lega d' resistenza
 con amour e con coscienza.
 Fasi ved mi contadein
 a ma quei lighed insein
 in Romagna o tielt paeis
 che finalment anche i Rimneis
 iè ste bon ai temp d'ades
 d' mettse in riga se progres;
 Quand arscriv' na poesia
 la lega fata a voi cla sia
 che in allora sa vivrò
 qualche cosa me av dirò
 sam riescirà l'inzegn
 di vost dover de vost contegn
 e a voi sperè che i contadein
 un di chi vaga a finì bein!

FINE

GIUSTINIANO VILLA

Proprietà Letteraria